

蓮

峯

集

蓮

江苏工业学院图书馆
藏书章

年

集

四庫全書珍本初集

別集部
集類部

欽定四庫全書

集部四

蓮峯集十卷

別集類三 宋

提要

臣等謹案蓮峯集十卷宋史堯弼撰堯弼字

唐英眉州人其仕履不見于史傳焦竑國史
經籍志堯弼蓮峯集三十卷而世間亦無傳
本故錄宋詩者多不能舉其姓名惟永樂大
典載有是集原序二篇其一作于乾道丙戌

自署曰省齋不知何人其一為任清全序作
于嘉定癸酉稱堯弼童州即迥出不凡少以
古樂府洪範等論往見張浚浚謂其大類東
坡留館於潭與張栻遊每開以正大之學歲
丁丑偕其弟堯文登第云云而亦不言其所
終考周密浩然齋雅談云李燾十八歲為眉
州解魁時第二人史堯弼方十四歲人疑其
文未工赴鹿鳴宴猶著粉紅袴太守命分韻

賦詩堯弼得建字援筆立成云四歲尚少房
元齡七步未饒曹子建後為張魏公客不幸
早世云云其所記與任清全序相合又江湖
續集載張煒題蓮峯集詩一首亦有句云一
梗江湖客三朝忠義家以諸書參互考證蓋
堯弼登第後未授官而卒也堯弼天姿踔絕
其詩縱橫排宕擺脫恒蹊其論策諸篇明白
曉暢瀾翻不窮亦有不可羈勒之氣大抵有

不足以及元...
四十六年...
...

原序

蜀士以文名者皆獲傳於世惟青衣史公堯弼唐英之
文未傳昔張丞相魏公一見公洪範等論謂義理之學
大類東坡手其文示諸子姪曰讀是則知為文之道而
況今天下學士欲拜下風而不得寧不矚目於斯文也
哉比因編次公平日所著文凡三十卷刊出與衆共之
亦以備蜀士之闕文云乾道丙戌八月既望省齋書
蓮峯先生史氏諱堯弼字唐英童州迥出不凡紹興中

史唐英之名滿於搢紳間天下知名士也李巽巖以南
北六朝策首送眉陽蓮峯在第二年甚少其文尤該博
非幼學所能兄弟三人兄長諱克俊歲辛酉四川類試
第一人蓮峯下第東書游東南時張魏公在潭雅聞其
名欲一見之蓮峯乃以古樂府洪範等論贄之魏公得
其文以示南軒曰此東坡先生之學也留館於潭明年
試湖南漕蓮峯第一南軒第二蓮峯因以文章正宗示
南軒而嘗曰文章一小技耳蓋每開之以正大之學引

而不發也是以南軒平生尊敬東坡先生不忘蓮峯歲
丁丑蓮峯偕其弟堯夫登第弟卒南軒以書相開勉具
述中庸復性之理是時南軒蓋年未二十也其自得已
如此非蓮峯養正之功也哉初魏公謫於潭禍不可測
蓮峯獨從之游觀其所贊詩章雖以戰守為正然其末
未嘗不歸之愛民也辛巳用兵魏公復起蓮峯亦登第
人為之喜蓮峯則曰魏公再用勿用兵乃可不然必再
敗未幾果有符離之刼人以為知言其議論據正不隨

世俯仰蓋如此是豈誇張誕謾苟以名勝相推激為重者之比哉清全總角侍先公家青衣江上蓮峯於先公為同年進士寓居栖禪寺時以小舟過先公率夜漏三十刻乃去清全傍立拱侍聽其言猶河漢無極也其文至多皆散落不存舊集漫漶今蓮峯兄長之嫡孫師道取而再刻之加以南軒少時一帖併諸公所跋附於其後使人知南軒少年自得乃蓮峯磨礪浸灌之力可考不誣也師道頃官蜀口遭值用兵亦主愛民之論不貪

苟進之功狂童在傍訖全其節以是受知於制閫相公
擢守古戎會鄰路有干戈之擾亦不樂用兵以去其尚
蓮峯之家法也哉嘉定癸酉年家子任清全敘

欽定四庫全書

蓮峯集卷一

宋 史堯弼 撰

五言古詩

寄上蘇邛州兼呈八座

稽首仇池翁歸在小有天
葛公尚遠孫岫嶠丹山傳道
骨亦有種而今見嬋媧大小茅山君霞襟兩聯翩弟兄
對譚道舌本風雷旋嗟哉空山子妄意身飛翾忍饑噉
草木閱歲烹永鉛豈知至妙門端在玄中玄知公夙領

此妙契遺蹄筌神凝物無疵合侍虛皇前我亦山澤臞
會了區中緣滅沒望仙輶願言執風鞭相將丹丘上一
笑三千年

遊洛陽寶蓋寺贈長老道瓊詩

一念落人境世路分崩華車輪戰黃埃荏苒還自昏安
知摩尼珠豈處濁水渾今我雖糾纏猶有故我存雲山
時獨往一笑清心魂舊聞寶蓋峯氣壓羣山尊拂衣事
幽討煙杉轉山根道人素所懽踴躍欣侯門清眸夾明

鏡眈眈老彪蹲招邀語密室歡頗生春溫往往到極則
寂歷雙忘言從今塵境空冰銷了無痕但覺江漢流浩
蕩旋其源至道默相喻不許諸方論

送章孝偁歸荆南

都官計用章郎中邛州人慶
歷中倅延安與范雍論西事

忤雍意竄雷州文正范公抗章
雪其愆乃還孝偁即其孫也

我岷西南橫盤石含靈光有蓄不得發湏洞難卷藏洩
為萬夫豪聯翩鬱相望緬懷嘉祐初赫赫都官郎著龜
抱先識虎豹披其章幕府西陲開挾策驅酋羌啞啞竟

莫吐反被按劍防青天徒昭昭萬里自投荒真氣終凜
冽身仆心難僵高平伊周徒奏疏排未央忠義一朝振
朱鳥吞光芒還知百歲後生此鷦鳳凰粲粲五色羽欲
下虞廷翔先民重世德君子思不忘祝君期無忝追攀
軼飛揚會使坤南隅氣象還蒼茫

次友生杜應求韻送中巖印老往成都正法

原原臨濟孫一一孤峯峻舊來正法眼不許窺閫
古人迹絕况復遺轍軻只今誰健者公亦師子迅倚天

劍氣寒掣電目光瞬平生縛虎手肯擊死蛇陣如何鬧
市裏撒手乃勇進前時老狐臊腥氣存已僅傾河看洗
滌餘刃聊斤擯坐令會府地園悟宗復振緬思中巖老
今代無此雋喜聞親嫡子高提曩真印要知天人師此
位那可閤好去露鞭影廣道收駟駿睠言清淨闕莫遣
衆魔磷願為一事大他物非所贖

醉卧至夜半半醒中若有所愧者聞空庭石渠
流水瀼瀼清亮不覺心體頓舒醉卧俱失因賦